

# *Texte zur Dorfgeschichte von Untervaz*



2026

Fasnacht in Untervaz

## vazer Häxa SCHNITZELBÄNK 2026



### Moni Dünser's Chatza im Kühlschrank

Hustier sin hüt ganz gross in Moda  
und unerlässlich, sägen au alli Pädagoga.  
S'seg guat für Chin sowiea für Alti  
wema sich a Hustier halti.

Schu allei d'Awesaheit vum pelziga Kuscheltier  
bericherat s'Hus und au s'Quartier.  
Dass sich das in jedera Hinsicht lohn,   
seit us Erfahrig au Dünser Moni.

D'Buabe beidi langsam flügge  
do wär a Chätzli gwüss no schnügge.  
Oder besser vielleicht grad zwei,  
dänn wär vu beidna keis allei.

Und schu umsorgt - gesagt getan -  
d'Moni zwei jungi Chätzli mit viel Elan.  
Notürli darf do chunt sie drus  
no keis vo beidna usem Hus.

Doch eines Abends wia chan das si,  
isch eini nūma uma gsie.  
In allna Käschtä hät sis gsuacht  
und allas Mögliche versucht.

Jo nu dän warti halt bis mora Morga  
und macht sich notürli grossi Sorga.  
Churz bevor sie ins Bett tuat sinka  
will sie no schnell go öpis trinka.

Sie risst frustriert der Kühlschrank offa,  
verschreckt und denkt, bin i jetzt bsoffa.  
Usem Kühlschrank springt mima riesa Satz  
a verstörti und halbverfrorni Chatz.

## Vazer Häxa SCHNITZELBÄNK 2026



### Der Flyerverteilungsplan vum Ökum. Kirchenchor

An vielna Orta sin im Advent  
besinnlich Konzert im Trend.  
Au üsera ökumenische Kirchachor  
nümmt sich für eimol Grossas vor  
und hät sich letschts Johr mit ema romanische Chor verstärkt  
für a grosses Gmeinschafts-Chorkonzert.

Und zum Werbechöshta spara  
sin sich alli schnell im Chlara  
ma chönt jo d'Flyer nid wia bisweila  
selber s'Vaz im Dorf verteila.

Doch das müass öppt akribisch plana  
sus laufi die Verteilig chaotisch us da Bahna,  
meint der Beat Huonder und er als pensionierte Polizischt  
seg für Strossasplän genau der richtig Spezialischt.

Und schu chündat ma für d'Mitglieder ob Frau oder Ma  
im Pfarreizenter a userordentliche Infoobat a.  
Der Plan seg gär nid kompliziert  
erklärt der Beat Huonder engaschiert.  
Dia uf em Plan farblich markierte Strossasita  
bedüten; roti Linia rechte Sita und blau Linia linke Sita.

Tagsdruf sin d'Mitglieder total verwirrt  
Stross uf Stross ab nu umagirt.  
Und so landen schlussendlich, kei Mensch chunt drus  
entweder keina, oder grad 7 Flyer im gliche Hus.

Ma munglat jetzt dä Optimischt  
heg als ehemalige Polizischt  
für dä Verteilungsplan, sich nid s'verstuh  
a Schnittmuschter vunera Uniform als Vorlag gnu.

## vazer Häxa SCHNITZELBÄNK 2026



### Der Dario Schrofer uf der Firmareis

A guata Mitarbeiterstamm  
weiss jeda Chef schu zimli lang  
isch nid nu guat für zfriedni Chunda  
ma chunt au besser über d'Runda.

Zindel United s'Maienfeld  
investiert derfür a Hufa Geld.  
Ma haltat sich akribisch stur  
an a gläbti Gschäftskultur.

Und wär das im Fall no hüt nid weiss  
dia sin s'lescht Johr uf a Megareis.  
Kader-, Geschäfts- und Spartaleiter  
mit zweihundertachzig Mitarbeiter  
in vier grossa Reiseclar  
uf Bella Liguria, wia wunderbar.

Und dän erscht das Event-Programm  
a unvergesslichs mitanan.  
Treking- Bike- oder Segeltour  
drei Tag Abenteuer pur.

Au kulinarisch wia im Schlaraffaland  
bi Sunnauntergang direkt am Strand.  
Und bi Spis und Trank und Alkohol  
fühlen sich alli pudelwohl.

Doch am Abreisetag sin dän nüma alli so präsent  
und in allna Büss verwörfens d'Händ.  
Schu dreimol hät ma durizellt  
und gmerkt, dass der Dario Schrofer fählt.

Zwei drei Kollega ghört ma fluacha,  
mir hän ihm all schu drei mol gruafa.  
Aber wohrschindli isch dä Kärli, jedi Wett  
agleit wieder zrug ins Bett.  
Und so verspötat sich dän rund,  
d'Abfahrt wäg däm Schrofer, um a volli Stund.

## vazer Häxa SCHNITZELBÄNK 2026



### D'Bleifüass vu da Vazermamis

Familia-, Bruaf- und Leischtigsstress  
führt oftmals hüt zuma Dauerstress.  
Doch d'Hauptsach isch, ma isch agil  
und derzua notürli au mobil.

Au Kathrin und Hanna sin engaschiert  
und beschtens durch-organisiert.  
Nüd isch ihna s'viel,  
zur Erreichig vu da Tagesziel.

Als erschts am Morga d'Chin versorga  
dänn schnell uf Chur go s'Ässa bsorga  
und sofort wieder heizua blocha  
zum da Chin und am Ma der Zmittag s'chocha.

Bi sonera Hektik spielt a Gschwindigkeitkontrolle  
halt meischtens nu a Näbarolla.  
Beidi rasen ima hölla Zahn  
bi Chur Nord über d'Autobahn  
wia a gschossni Fäderballa  
direkt in Baustell-Radarfalla.

Bald chunt dän halt, wias eba muass  
zu beidna hei di saftig Buass.  
Und beid hän für Erziehigszweck  
grad au der Uswis no aweg.

Wia chunt das au mit der neua Chirchgass-Drisgerzona,  
wenn dän im Dorf, tüan nu no uswislosi Mamis wohna.  
Mir ghören d'Vazerpender jetzt schu mürrisch grolla:  
"Warum sind dän alli Bös, ufzmol so pumpavolla!"

## Vazer Häxa SchnitzelBänk 2026



### A alta Jungjäger uf der Pirsch

Üsera lieba Walli Holz  
isch uf sina Jägersohn, uh heimli stolz.  
Au ihn reizt dia Jagd ufzmol immens  
und er erwirbt sich im spota Alter no d'Bündner Jagdlizenz.

Stolz isch dänn der alt, jedoch frischgebackni Jäger  
uf Pirsch wia sin jung, jedoch bereits erfahra Sträber.  
Alli wünschen Weidmannsheil  
und beidi findens megageil,  
gönn anän no dia letschta Tipps  
und hocken gespannt uf ihri Sitz.

Nervös beid Auga hinderem Glas  
gseht der Walli schu aswas,  
erkennts genau dur sis Visier  
a prächtigs Gams stoht in Spalier.

Wibli, Männli, Kriggelmass,  
vielviel Meter sin ächt das,  
der Finger am Abzug zugt und zugt  
das allas macht ihn ganz varuggt.

Au s'Reglement isch im Moment  
komplett awäg – inexistent.  
Das allas fuhart dänn halt zum Schluss  
zuma übereilta Schuss.

As tuat a Klapf, s'Tier macht a Sprung  
und s'Gams kheit suber troffa um.  
A Juchz ertönt, er hoffts und glaubts  
s'sei hoffentlich kei Unerlaubts.  
Will, das wüssen jo au miar  
vor em Bock brusch zersch a wiblichs Tier.

Doch oh Schreck, was lit am Boda,  
a alta Bock mit pralla Hoda.  
Und der Walli seit zum tota Bock:  
"Was lausch mir vor da Lauf du Nogg.  
Und jagdlich säg der grad no eis,  
das "Ladies First" isch der letschti Scheiss!"

## vazer Häxa SCHNITZELBÄNK 2026



### René Webers grossi Klappa

Am legendära Vazer Skitag hät sich dr René Weber über d Männerriega lustig gmacht.

«Ha, das isch doch nöd meh als es Mukiturna!» hät er gspöttlet und glacht.

Druf aba hät dr Giacomo Lecchino in als Gastturner zuma Training ufbota und das nid öppa wäg dr guata Teilnehmer Quota.

Uf Giamo's Wunsch: «Machend ds Training richtig intensiv- wenn's goht. Mim Ziel, dass dr René dia Turnhalla uf allna Viera verloht.»

Also Weber jetzt heisst's liefere, nid nu lafera!

Dr René kriagt a hochroota Grind-hät gschnufet wia a alti Dampfloggi  
jo, jo Weber- sona Männerriega isch halt nid nu Schoggi.

Noch sagahaftem eimol trainiara,  
jömerlet er: «i muan glaub mis Knüü opariara!»

Sit dua hät ma ihn in dr Turnhalla niameh gseh.  
Schiins weler im neua Johr sis Comeback geh.

Amol luaga wia lang er das durastoht  
oder villicht doch lieber ins Mukiturna goht?

René, es gäbt no es Altersturna im sitza,  
döt müasstisch au nöd so schwitza.

## Vazer Häxa SCHNITZELBÄNK 2026



### Vazer Golfer händ a schwachi Blosa

Im Golfclub Domat/Ems sind d Vazer Golfer gern gsehni Gäst,  
dia blieband au amol höckla und hän es Fäscht.

Noch ara gmüatlicha Golfrundi isches immer so,  
dass sie sich uf dr Terrasse tün nider lo.

Bierli oder Rotwii, do lönd sie sich nid lumpa  
und dr Benno raucht wia immer sina Stumpa,

Im Herbst wird Schiebetür zur Terrasse gschlossa wägem kalta Wind,  
wenn d Gäst im Restaurant am Essa sind.

Das heisst, d Vazer müand rings um ds Gebäude go  
zum im WC ans Pissoir stoh.

Wär dr Lolo kennt dä weiss, das isch ihm viel ds umständlich das Ganza.  
Er stoht an da schön agleiti Teich und schifft in d Wasserpflanza.

Dass ihm alli zualuaga chön, das hät dr Lolo nid gstört,  
aber d Gäst im Restaurant sind total empört!

Golfer ufem Abschlag 10 händ Frontalsicht vom Lolo bim brunza-mmh au nett,  
dä Kerli verstoost wider gäga jedes Etikett!

## Vazer Häxa SCHNITZELBÄNK 2026



### Familia Leopold macht Feria z'Griachaland

Moussaka, Ouzo, Meer und Sand...

Üsi Gerda und dr Beat machend Feria im wunderschöna Griechenland.

Wia usem Bilderbuach dia Sunnauntergäng  
Sirtaki wird tanz zu griechischa Kläng.

Feini Souvlaki mit Tzaziki

Gerda was meinsch, no schnell a.... Glas Wii?

Am Morga wird ma vonara frischa Meeresbrisa geweckt,  
denn bir offna Balkontür pfusa,isch eifach nur perfekt.

D Vorhäng bewegend sich mitem Wind,  
D Gerda hüpfet usem Bett ganz gschwind.

Elegant zücht sie beidi Vorhäng offa,  
do wird sie unsanft am Kopf troffa.

Dr Beat ghörts clippera und rumpla bis ins Bad.  
«Was isch au Gerda? I chuma grad.»

Er ghört sini Gerda elend klaga,  
denn dia liegt unter da Vorhäng samt dr Stanga begraba.

## vazer Häxa SCHNITZELBÄNK 2026



### Tattoomissgschick vur Sereina

Üses Kücken Sereina Hug isch im Summer 40gi cho.  
Iara Wunsch: An däm Tagmöcht i am Ballermann sto.

Mit Kolleginna flügt sie Mallorca entgäga,  
das isch cool und wird so richtig fäga.

Mittlerwila isches hoch im Trend,  
bim Tätowierer verewiga, sona \*happy Feriamoment\*!

Au d Sereina möcht sich a bliebendi Erinnerig in d Huut ritza  
und tuat ines Tatoostudio sitza.

«I wett mis Geburtsdatum dr 4.7, das wär doch schick,  
so in römische Zahla wär's nomol a speziellere Kick.

Äämm, wie isch jetzt das mit däne römische Zahla nomol genau?  
Ach, öppert weiss es denn scho und sus sicher ChatGPT au.»

Wieder dahei- präsentiert d Sereina dr Jeannine stolz iari neust Errungaschaft.  
Doch noch gnäuerem häraluaga, hät d Jeannine Träna glacht.

«Liabi, das heisst nid 4.Juli, das heisst 4.August,  
a römische Strich zviel-was für a Frust!  
I han a biz für die recherchiert,  
jetzt häsch halt ds Geburtsdatum vom Florian Silbereisen tätowiert.»

## vazer Häxa SCHNITZELBÄNK 2026



### Dachs Jagd à la Hedinger

Dr Neujäger Noah Hedinger isch unterwägs ins Pizital uf Pirsch,  
in dr Hoffnig er treffi uf a Reh, Gams oder Hirsch.

Begleita tuat ihn sin Bruader bi so Sacha,  
denn dä möcht au ds Jagdpatent macha.

«Jonas, i versprecha diar: ds erste erlaubta Tier wo miar hüt vor d Flinta chunnt,  
däm schloot dia letscht Stund.»

Geduldig sinds ghöcklet dia zwei Brüader uf iarem Sitz.  
Plötzlich raschlet- a Dachs im Visier - das isch kei Witz.

Dr Noah haltet sis versprecha und wechslet uf d Mungga Munition,  
am 19.30 am Obet ballerets mit lutem Ton.

Leider hätter dä Dachs nid suber troffa,  
das agschossna Tier hät d Richtig gwechslet und isch ihna entgäa gloffa.

« Jöni, Jöni dä Dachs grieft üs a! Was machemer do?»  
«Noah, tuan lada und schüss nomol no!»

Doch bim Noah liggend d Nerva blank,  
er hätti viel liaber das Tier tät kei Wank.

Plötzlich- öppa 5 Meter vor ihna isch dä Dachs zBoda  
und tuat sich nūma roda.

Nid öppa dr Noah, nein dr Jonas muass go luaga, wia's däm Tier au goht,  
während dr Noah im Sicherheitsabstand hinadra stoht.

Lustig! Schüssa wela- säb denn woll,  
aber kum würds bränzlig -d Hosa voll!

## vazer Häxa SCHNITZELBÄNK 2026



### Flurinas Trampolinshow

D Kindergärtnerin Flurina möcht im Alter unbedingt beweglich blieba.  
Drum tuat sie regelmässig Sport trieba.

Doch gwüssi Sacha macht sie liaber über dr Landesgrenza,  
denn in dära Disziplin sind's vorbildlich iari Referenza!

Euphorisch gumpst sie in Triesa ufem Trampolin in d Lüft  
und zeigt iarna Neffa - wia's gschmeidig sind iari Hüft.

«Buaba, bima richtiga Salto landet ma nid ufem Füddla, nein nei  
I zeig's eu- ma landet gekonnt uf beidna Bei.»

Bim 1. Versuch muass sie sich leider blamiara.  
«Jungs, das cha da Besta passiara.»

Dr Chäspi meint, sie söll doch höra.  
Aber d Flura packt dr Ehrgez - sie will nüd ghöra.

Voller Elan holt sie nomol Schwung und denn...  
lares Gsicht schließt am Sicherheitsnetz entlang,

dr Gsichtsausdruck wird quält und bang!  
Au ds Knüü fühlt sich ganz komisch a.

Ach, hätti doch glosset uf mina Maa.  
Obwohl! Usgiebig küahla im Pool- denn isch das Bei raz faz wider mobil,  
setzt sie sich a neus Ziel.

Flurina! Au d Liachtasteiner hän kei heiligs Wasser- höchstens a Fürstatitel  
aber für dis agrissna Innaband- git's leider kei Wundermittel.